

Govor visokog predstavnika, Paddy Ashdowna u kojem naglašava glavnu ulogu Policijske misije Evropske Unije

Veoma mi je drago što sam danas ovdje, i drago mi je što na ovaj način možemo obilježiti prvih nekoliko mjeseci rada misije EUPM-a.

Gotovo je nevjerovatno da su četiri mjeseca prošla kako je EUPM nastavio tamo gdje je UN IPTF stao.

Već ste postali tako uobičajen dio svakodnevnice u BiH da je ponekad lako zaboraviti da je misija EUPM-a još uvijek relativno nova. Činjenica da ste se tako brzo prilagodili situaciji u BiH samo je potvrda vašeg profesionalizma, a prije svega priznanje mom prijatelju i kolegi, komesaru Svenu Frederiksenu.

Današnja ceremonija dodjele medalja samo je još jedan značajan momenat u radu ove misije.

Naravno, u posljednjih nekoliko sedmica veoma tragični događaji u ovom regionu su nas podsjetili na značaj vašeg zadatka.

Ubistvo premijera Đinđića u Beogradu pokazalo je da borba između između vladavine zakona i vladavine mafije na Balkanu još uvijek nije gotova. Atentat na premijera Đinđića ukazao je na to da je ova regija još uvijek veoma osjetljiva, i da su institucije vlasti preslabe. Moramo biti potpuno jasni kada govorimo o prirodi ove borbe, čiji je epicentar trenutno na ulicama Beograda, ali čiji se snažni talasi razliježu širom

regije. Jednostavno rečeno, to je borba između snaga reda i civiliziranosti s jedne strane, te anarhije i barbarizma s druge.

Ova bitka još uvijek nije dobijena.

Ali pobjeda je neophodna, i bitka će biti dobijena, za dobrobit Evrope, te za dobrobit ljudi u ovoj regiji.

Zbog toga je vaš rad ovdje u BiH toliko značajan.

Policijci EUPM-a iz zemalja Evropske unije i onih koje nisu članice Evropske unije zajedno rade u stanicama širom Bosne i Hercegovine, iz dana u dan, iz sedmice u sedmicu, i pomažu svojim kolegama policajcima iz BiH da pobijede u toj borbi. Oni rade kako bi ovoj zemlji ponudili prvoklasne policijske snage, snage koje zadovoljavaju najviše profesionalne standarde, evropske policijske snage koje mogu stajati rame uz rame sa najboljim u Evropi.

Ubistvo Zorana Đinđića ukazalo je da problemi sa kojima se suočavamo u borbi protiv organiziranog kriminala nisu problemi s kojima se suočavamo sami. To su zajednički problemi, problemi Balkana, problemi cijele Evrope.

Ovu opasnost možemo pobijediti samo ako se borimo protiv nje udruženim snagama.

Vlasti u Srbiji su jasno stavile do znanja da su odlučne u namjeri da u tome uspiju. Razbili su lanac organiziranog kriminala u svojoj zemlji, i u toj borbi tražili su pomoć susjednih zemalja.

U BiH moramo odgovoriti na njihov poziv za pomoć, kao što su premijer Terzić i vlasti u BiH već jasno stavili na znanje. Obaveza je svih organa za provođenje zakona u BiH – policije, SBS-a i SIPA-e – da pomognu u ovoj borbi.

Očekujemo da će im EUPM pomoći u obavljanju ovog ključnog zadatka.

Zbog toga što je organizirani kriminal upravo to – organiziran.

Organizirani kriminal zavisi od mreža i kontakata koji nisu ograničeni državnim granicama i policijskom jurisdikcijom.

Iz tog razloga sam pozvao bh. organe vlasti da tijesno sarađuju sa organima vlasti u Beogradu i drugim glavnim gradovima na Balkanu kako bi razmijenili informacije o ovim mrežama.

Nadalje, od najveće je važnosti da borba protiv organiziranog kriminala i dalje ostane jedno od prioritetnih pitanja u BiH. Kako smo komesar Frederiksen i ja u srijedu na Samitu o borbi protiv kriminala jasno rekli entitetskim i državnim organima vlasti moramo spriječiti da BiH postane utočište za kriminal na Balkanu. Evropska unija pridaje veliku važnost ovom pitanju i biti će nam potrebna vaša pomoć i podrška ukoliko želimo eliminirati organizirani kriminal.

Međutim, kao što sam prije nekoliko trenutaka rekao glavni cilj misije je da razvije, u toku narednih nekoliko godina, policijske snage u BiH koje ispunjavaju evropske policijske standarde. Trebate nastaviti na osnovama koje je svojim aktivnostima uspostavila UN Misija u BiH, kako bi smanjili policijske snage u BiH i organizirali ih prema osnovnim profesionalnim standardima. Vaš zadatak je da završite taj posao.

Vaš drugi zadatak se odražava u drugačijoj misiji koja vam je povjerena. EUPM nije UNMIBH. Vi trebate biti ne samo kolege nego i mentori koji prate rad svojih bh. kolega. To je težak posao koji zahtijeva strpljenje, sposobnost i upornost.

Ponavljam, nalazimo se na početku. Vaša misija tek započinje sa svojim radom. Međutim, počeli ste sa dobre i profesionalne osnove. Dodjeljivanjem ovih medalja želim vam čestitati na tome kao i na ulozi koju ste imali u ostvarivanju ovog cilja.